

- प्रधानमंत्री नरेन्द्र मोदी कह्यो—नई दिल्ली मांय लालकिला कने कार मांय धमाका री वारदात रा जिम्मेदार लोगां ने नी बख्शा जावेला।
- अंता विधानसभा सीट माथे उपचुनाव सारू आज शांति सागे वोट पड़्या— सिंज्यां साढे पांच बज्यां ताई करीब 78 फीसदी वोट पड़बा रा समाचार।
- राज्य सरकार 12 जिलां रा 7 हजार 451 गांवां रे अभावग्रस्त व्हेवण रो ऐलाण करी ज्यो।
- मौसम विभाग आवता 2 दिन जयपुर अर सीकर संभाग मांय घणो सीळो बायरो बाजण रा आसार जताया।

000

प्रधानमंत्री नरेन्द्र मोदी कह्यो है के नई दिल्ली मांय लाल किला कने एक कार मांय धमाको करण वाळां ने नी बख्शा जावेला अर ई रा जिम्मेदार लोगां ने न्याय रा कटघरा मांय पूगाया जावेला। भूटान रा दौरा सारू गया प्रधानमंत्री मोदी थिम्फू मांय राख्यी ज्या एक कार्यक्रम मांय कह्यो के काल सिंज्यां दिल्ली मांय व्ह्यो वाक्यो सगळां ने घणो दुःखी कीनो है।

-----

ई बीचे गृह मंत्री अमित शाह कार मांय धमाका रा वाकया पाछे हालात रो जायजो लेवण सारू आज वां रा रहवास माथे केंद्रीय गृह सचिव, खुफिया ब्यूरो रा निदेशक, दिल्ली पुलिस रा कमिश्नर अर राष्ट्रीय अन्वेषण अभिकरण—एनआईए रा महानिदेशक सागे मीटिंग कीनी। जम्मू—कश्मीर रा पुलिस महानिदेशक ई मीटिंग मांय वर्चुअल तरीका ऊँ जुड़्या। रक्षा मंत्री राजनाथ सिंह ई ई मामला रा जिम्मेदार लोगां ने न्याय रा कटघरा मांय लावण रो भरोसो दिरायो। वे आज नई दिल्ली मांय राख्यी ज्या दिल्ली रक्षा संवाद मांय बोल रह्या हा। रक्षा मंत्री कह्यो के खास जांच एजेंसियां ई मामला री तेजी ऊँ अर गहराई ऊँ जांच कर रही है अर जांच रा नतीजा बेगा ई सगळां ने बताया जावेला। श्री सिंह ई हादसा रे कारण मरण वाळां रा पिरवारवाळां रा प्रति दुःख जतायो।

000

केंद्रीय संस्कृति अर पर्यटन मंत्री गजेन्द्र सिंह शेखावत कह्यो है के दिल्ली मांय काल व्ह्या धमाका री जिम्मेदार देश या परदेस री किण ई ताकत ने नी बख्शी जावेला। वे खबरनवीसा सागे बातचीत करता थकां कह्यो के कश्मीर ऊँ हरियाणा, दिल्ली अर गुजरात ताई मोटा नेटवर्क री ठा पड़ी है।

000

बारां जिला री अंता विधानसभा सीट माथे उपचुनाव सारू आज शांति सागे वोट पड़्या। सिंज्यां साढे पांच बज्यां ताई ई विधानसभा हलका मांय 78 फीसदी ऊँ बत्ता वोट पड़बा रा समाचार है। बारां रा अतिरिक्त जिला निर्वाचन अधिकारी भंवर लाल आकाशवाणी ने बताया के वोट शांति सागे पड़्या। अंता मांय वोट देवण सारू मतदान केंद्रां माथे लम्बी लेणा निजर आयी। दूजी कानी साकली गांव रा मतदान केंद्र संख्या—219 माथे लोग वोट देवण ऊँ नट गया। वां री हिमायत मांय निर्दलीय उम्मीदवार नरेश मीणा धरनो दीनो हालांकि 15 मिनट पाछे ई वे धरनो खत्म कर दीनो।

अंता उपचुनाव सारू भारतीय जनता पार्टी रा मोरपाल सुमन, कांग्रेस रा प्रमोद जैन अर निर्दलीय नरेश मीणा समेत 15 उम्मीदवार चुणाव लड़ रह्या है। वोटों री गिणती 14 नवम्बर ने करी जावेला। भाजपा रा विधायक कंवर लाल मीणा ने एक जूना मामला मांय अदालत कानी ऊँ दोषी करार दिया जावण रे कारण ई साल मई महीना ऊँ वां री विधानसभा सदस्यता खत्म कर दीरीजी ही। ई कारण ई सीट माथे उपचुनाव करायो जा रह्यो है। दूजी कानी बिहार मांय आज 20 जिलां री 122 विधानसभा सीटां माथे चुनाव सारू वोट पड़्या। वठे दोपहरां पाछे 3 बजां ताई 60 दशमलव चार—शून्य फीसदी वोट पड़बा रा

समाचार है। किशनगंज मांय 66 फीसदी ऊँ बत्ता वोट पड़बा रा समाचार मिल्या है जो ई विधानसभा चुनाव रा दूजा दौर मांय शामिल 20 जिलां रा विधानसभा हलकां मांय सब ऊँ बत्तो है।

000

प्रदेश मांय चाल रह्या मतदाता सूची विशेष गहन पुनरीक्षण अभियान रा तैत मतदाता गणना प्रपत्र ऑनलाइन तरीका ऊँ ई भर्या जा सके है। ऑनलाइन अर्जी सारु अवजमतेण्मबपण्हवअण्पद वेबसाइट माथे फॉर्म भर्या जा सके है। मतदाता केवल खुद रो ऑनलाइन गणना प्रपत्र भर सके है। ई सारु मतदाता पहचान पत्र अर आधार कार्ड री जाणकारी रे जरिये फॉर्म भरण वाळां रा ई—हस्ताक्षर उपकरण माथे नाम बिल्कुल एक सरीखा व्हेवणा चाहिजे। ओ फॉर्म भरण सारु वोट देवण रा हकदार लोगां रा मोबाइल नंबर मतदाता पहचान पत्र ऊँ जुड़्या व्हेवणा चाहिजे। गणना प्रपत्र ऑनलाइन जमा करावण वाळां ने बी. एल.ओ. कानी ऊँ दियो ज्यो फॉर्म भरण री जरूरत नी है।

000

राज्य मांय 12 जिलां रा 7 हजार 451 गांवां रे अभावग्रस्त व्हेवण रो ऐलाण करी ज्यो है। ई पाछे बांसवाड़ा, ब्यावर, डूंगरपुर, जोधपुर, भीलवाड़ा, नागौर, राजसमंद, डीडवाना—कूचामन, सवाईमाधोपुर, श्रीगंगानगर, बालोतरा अर चित्तौड़गढ़ जिलां री 98 तहसीलां रा काश्तकारां ने सरकार मदद देवेला। आं जिलां रा गांवां मांय घणी बिरखा रे कारण 33 फीसदी या बत्ता फसल खराबा वाळा किसानां ने कृषि अनुदान दियो जावेला।

000

जैसलमेर कने पाकिस्तान ऊँ लाग्योड़ी सरहद माथे फौज युद्धाभ्यास त्रिशूल कर रही है। आज मरु ज्वाला अभ्यास रे दौरान फौज थळी हलका मांय मारक बूता रो दरसाव करता थकां दुश्मन रा काल्पनिक ठिकाणां बर्बाद कीना। म्हाणा जैसलमेर खबरनवीस बतायो के ई अभ्यास रा तैत फौज रा नुवा हथियारां रा बूता री ई जांच करी ज्यी।

000

भगवान बिरसा मुंडा री 150वीं जयंती रा सिलसिला मांय भारतीय जनता पार्टी री ओर ऊँ प्रदेश मांय 15 नवम्बर ताई “जनजागरण अभियान” चलायो जा रह्यो है। ई रा तैत भगवान बिरसा मुंडा समेत आजादी री लड़ाई मांय शामिल व्हेवण वाळा सगळा जनजातीय सेनानियां रा काम री जनता ने जाणकारी दी जा रही है। 13 ऊँ 15 नवम्बर ताई भाजपा री ओर ऊँ जनजाति वर्ग रा स्वतंत्रता सैनानियां रा स्मारकां माथे साफ—सफाई रा अभियान सागे दीपोत्सव मणायो जावेला। 15 नवम्बर ने राष्ट्रीय जनजाति गौरव दिवस रे मौके डूंगरपुर मांय जनजाति सम्मेलन राख्यो जावेला। जनजागरण अभियान रा तैत टाउन हॉल मीटिंग्स, निबंध, सामान्य ज्ञान अर भाषण री होड़ा समेत न्यारा—न्यारा कार्यक्रम राख्या जावेला। जनजाति गौरव वर्ष रा तैत चिकित्सा विभाग री ओर ऊँ आज सवाईमाधोपुर मांय मुफ्त जांच अर ईलाज रा शिविर लगावण रो काम सरु करी ज्यो। ई रा तैत सगळा आंगनबाड़ी केन्द्रां माथे महिलावां रा स्वास्थ्य री जांच करी जा रही है। शिविर मांय आसवाळी लुगाइयां री ए.एन.सी. जांच अर नान्हा बच्चां रे बीमारियां ऊँ बचाव रा टीका लगाया जा रह्या है। म्हाणी डीग खबरनवीस बतायो के जिला रा एकला आदिवासी गांव मांय आज स्वास्थ्य जांच शिविर लगायी ज्यो।

000

प्रदेश मांय सर्दी रो असर धीरे—धीरे बधबा लाग्यो है। लारली रात सीकर जिला रा फतेहपुर मांय सब ऊँ कम 6 दशमलव 9 डिग्री सेल्सियस न्यूनतम तापमान दर्ज करी ज्यो जद के सीकर, पिलानी, दौसा, नागौर, चूरु, सिरौही अर अंता मांय ई रात री बगत पारो 10 डिग्री सेल्सियस ऊँ नीचे रह्यो। 8—9 ठौड़ां तापमान 10 डिग्री सेल्सियस नापी ज्यो। दूजी कानी बाड़मेर मांय सब ऊँ बत्तो अधिकतम तापमान 33 डिग्री सेल्सियस दर्ज करी ज्यो। मौसम विभाग आवता एक सप्ताह मांय मौसम सूखो रेहवण सागे पारो 2—3 डिग्री सेल्सियस और उतरण रा आसार जताया है। मौसम केन्द्र जयपुर आवता दो दिन जयपुर अर सीकर संभाग

मांय सीळो बायरो बाजण अर टोंक ज़िला अर सीकर ज़िला मांय आवता 5 दिन तांई घणो सीळो बायरो बाजण री संभावना जतायी है।

000

भरतपुर रा नामी बारैठा बांध हलका मांय अब जयपुर बायोलॉजिकल पार्क री भांत नुवो बायोलॉजिकल पार्क बणायो जावेला। ई सारू राज्य सरकार एक करोड़ रुपया मंजूर कीना है।

000

खेलो इंडिया यूनिवर्सिटी गेम्स 24 नवम्बर ऊँ 5 दिसंबर तांई अजमेर, जयपुर, भरतपुर, उदयपुर, कोटा अर जोधपुर मांय राख्या जावेला। आं खेलां रा निशाण, गान, मशाल अर जर्सी रो काल जयपुर कने आमेर रा किला मांय अनावरण कर्यो जावेला। खेलो इंडिया यूनिवर्सिटी खेलां रा तैत 24 खेलां मांय देशभर ऊँ करीब 200 विश्वविद्यालयां रा 7 हजार ऊँ बत्ता खिलाड़ी खेलेला। 12 दिन तांई चालण वाळा आं खेलां रा तैत जयपुर मांय 11, उदयपुर मांय 3, अजमेर, भरतपुर, बीकानेर, जोधपुर अर कोटा मांय 2-2 खेलां री होड़ां राख्यी जावेला।

000